



# Conférence Episcopale d'Haïti CEH

56, Angle Rues Piquant et Lamarre, Champ-de-Mars, HT 6110, Port-au-Prince, Haïti (W.I.)

Tél. : (509) 3701-2232 / 3701-2215 / 3388-7304

e-mail : [ceh56@hotmail.com](mailto:ceh56@hotmail.com) / URL : <http://eglisecatholiquedhaïti.org>

## **Mesaj Evèk Legliz Katolik Ayiti yo voye pou Pèp Bondye a: pè yo, mè yo, frè yo, fidèl layik yo ak tout moun ki gen bon volontè pou Karèm 2025 la**

### ***Pèleren lesperans, an nou pran chimen limyè Pak Granmèt la***

1. Tan karèm nan rive sou nou ane sa nan kontèks Ane jibilè 2025 la. Pap Franswa envite nou viv Ane lagras ak transfòmasyon sa a nan lesperans. Konsa, nou tout envite pou nou fè Pak sa a tounen yon veritab pelerinaj esprityèl k ap mennen nou nan Pak Jezi Kri a, vrè sous esperans nou.
2. Nan sitiyasyon patikilye Ayiti ye a, n ap viv tan karèm sa a tankou yon vrè chemen penitans. Sa fè deja twò lontan depi n ap konnen soufrans san parèy sa a ki make ak move tèrè vyolans yo, mechanste gwoup ame yo ak konpòtman pouryanis oswa enpisans moun ki ta dwe garanti lajistis ak lapè nan peyi a. Menm jan ak lè pèp Izrayèl la t ap kouri pou mizè Lejip t ap fè l pase oswa lè lòt nasyon lènmi te konn anvayi li, n ap viv yon moman kote fòs fènwa yo sanble dechennen, kote san inosan yo ap pouse kout rèl monte nan syèl la.
3. Chak Ayisyen dwe santi li konsène epi endiye poutèt ravaj sa a peyi nou an ap sibi a. Yo detwi, sou tout fòm epi yon fason òganize, anpil estrikti enpòtan nan lavi peyi a, espas ki gen pou wè ak lasante (lopital, famasi, laboratwa medikal) ak espas ki gen pou wè ak ledikasyon (bibliyotèk, lekòl, inivèsite), domaj k ap fèt sou lavi moun ki sakre. Nou pa gen mo pou nou pale sou zak malonèt sa a, kote yo pran yon ti bebe nan men manman li ak vyolans pou lage li nan dife devan je manman an ki, podyab, ap gade bagay tèrib sa a. Moun ki egzekite zak tèrib sa a ta dwe jije epi pini tousuit.
4. Nivo mal k ap frape nou la a mande nou antre byen fon nan konsyans nou. Sila yo k ap detwi lavi epi touye rèv tout fanmi sa yo, pèdi tout konsyans sa yo rele byen ak mal. Men egzistans moun sa yo tou se imaj yon sosyete malad, ki wonje ak enjistis, kòripsyon ak lamizè. Yo aji san pè, san krent, yo menm sanble moun ki byen pwoteje. Ki men ki kache dèyè yo ? Pou kiyès y ap travay nan egzekite pwojè destriksyon peyi nou renmen anpil la ? Moun ki gen pouvwa ak otorite pou mete fren nan aksyon y ap poze yo, poutan k ap gade yo k ap aji san fè anyen, fè tèt yo parèt konplis nan vye zak k ap fèt yo.
5. Karèm nan envite nou konvèti. Chak moun, nan nivo pa li, dwe poze tèt li kesyon sa a : èske mwen kite konpòtman pouryanis mwen oubyen laperèz anpeche mwen vin patizan lapè ? Èske mwen pa kontribye, ak desizyon m yo, pou ranfòse enjistis k ap pran pye nan peyi a ? Envitasyon pwofèt Jowèl la sonnen ak fòs pou nou : « kase tèt tounen vin jwenn mwen ak tout kè nou, nan fè jèn, kriye ak dèy. » (Jowèl 2, 12).

6. Frè ak sè nou yo, malè frape nou men nou pa pou kont nou. Jezi Kri te fè fas ak sa nan pasyon li lè l te aksepte pote tout chay soufrans limanite sou do li. Pak li a se esperans nou. Li aprann nou vyolans ak lanmò pa gen dènnye mo. Pak Kris la se vikwa sou fènwa mal la.

7. Pèp nou an k ap kouri pasi pala ak lapenn nan kè li kapab jwenn fòs pou li leve kanpe ankò. Men sa egzije yon chemen lafwa, solidarite ak aksyon ki klè. Esperans kretyèn nan pa vle di tann mal la disparèt san nou pa fè anyen. Se yon apèl pou nou konstwi, nan lafwa ak lajistis, yon sosyete kote lavi respektè, kote dwa plase pi wo pase fòs brutal la, kote chak moun ap santi li responsab byennèt tout moun.

8. Nan sitiyasyon detès n ap viv la, nou envite chak batize fè karèm sa a tounen yon tan konba esprityèl ak angajman klè, nan jèn ak lapriyè. Fas ak mal ki depase nou an, fòk nou rele Bondye san rete. Se pou legliz nou yo vin tounen espas lapriyè pou lapè. An nou ede viktim yo vrèman, an nou soutni moun yo ki pèdi tout sa yo te genyen yo, an nou fè aksyon pou nou soulaje pi fèb yo. An nou youn tounen pou lòt la : men k ap redrese, vwa k ap pote sekou.

9. Nan lannwit doulè sa a, vwa legliz la vle tounen vwa Kris la menm k ap mande pou nou pa bay laperèz, dezespwa ak rayisans legen. Karèm nan raple nou chemen nou pa fini devan lakwa : li mennen nou nan rezireksyon.

Kòm pèleren lesperans, an nou vanse sou chemen Pak sa a ki anonse vikwa lavi sou lanmò.

Se pou Nòtredam Pèpityèl Sekou, Manman pèp nou an, akonpaye nou epi lapriyè pou nou.

Mesaj sa a soti nan Kay kote Evèk Katolik peyi Ayiti yo konn reyini, Lilavwa, jou ki 3 mas 2025 la.

Men siyati Evèk Katolik Ayiti yo :

  
Monseigneur Max Léroy MESIDOR  
Achevèk Pòtoprens  
Prezidan CEH

  
Monseigneur Joseph Gontrand DECOSTE, SJ  
Evèk Jeremi  
Sekretè Jeneral CEH

  
Monseigneur Pierre André DUMAS (Ospitalize)  
Evèk Ansavo ak Miragwan  
Visprezidan CEH

  
Monseigneur Désinord JEAN  
Evèk Ench  
Ekonom CEH

Kadinal Chibly LANGLOIS  
Evèk Okay  
Konseye

Monseyè Marie Erick Glandas TOUSSAINT  
Evèk Jakmel

Monseyè Launay SATURNE  
Achevèk Okap Ayisyen

Monseyè Charles Peters BARTHELUS  
Evèk Pòdepè

Monseyè Yves Marie PEAN, CSC  
Evèk Gonayiv

Monseyè Sander LOUIS-JEAN  
Evèk Oksilyè Pòtoprens

Monseyè Quesnel ALPHONSE, SMM.  
Evèk Fòlibète

Monseyè Wismick JEAN-CHARLES, smm  
Evèk Oksilyè Pòtoprens

